

四庫全書

集部

欽定四庫全書

唐詩紀事卷五十

宋 計敏夫 撰

封敖

鄭薰

王軒

宋雍

李摯

韋澳

段文昌

姚向

溫會

李敬伯

姚康

張正元

楊嗣復

炙轂子

楊厚

劉郇伯

王觀

陳上美

侯列

崔樞

陳彥博

郭良驥

崔嘏

李景遜

唐球

封教

教為池州刺史題西隱寺云三年未到九華山終日披
圖一室間秋寺喜因晴後賞靈峰看待足時還猿從有
性留僧坐雲靄無心伴客閑勝事儻能銷歲月已拚名
利不相關

教字碩夫冀州人雅為李德裕所器武宗時詔慰邊將
傷夷者曰傷居爾體痛在朕躬劉稹平德裕進太尉制

曰言皆予同謀不他惑皆教為之終尚書右僕射才高而少行檢故不至宰相

鄭薰

贈翬疇詩序云九華處士翬疇擅玄言之要通易老其於淨名僧肇尤精達余在句溪時重其能車幣而致之及到官舍再說易一說老氏將兒姪輩執卷列坐而傳之老氏畢業而寇難作與翬各散去不知其何之存耶亡耶余既休居洛師鑠扉獨靜己卯冬十一月半雪中

有客叩柴門樵童視之走復曰羣處士遽下榻開關執
手話艱苦羣背簷笈草履杖靈壽下笠且含笑曰聞公
恬養淡逸不屑於榮悴故以玄來助成之升榻解四書
即易老淨肇也明日講肇論階前多偃松高桂冰凍墮
落有琴瑟金石聲理致明妙神骨超爽自謂一時之遇
日與故人為徒又意茲樂之難諧也遂成二十韻贈之
詩云密雪松桂寒書窓導餘清風撼冰玉碎階前琴磬
聲榻淨几硯潔帙散縑緗明高論展僧肇精言資羣生

立意加玄虛析理分縱橫萬化悉在我一物安能驚江
海何所動邛山常自平遲速不相闕後先徒起爭鏡照
各妍醜秤稱分重輕顏容寧入鑑銖兩豈關衡蘊微道
超忽剖證音泠泠紙上掣牢鍵舌端搖利兵圓澈保真
性客塵排妄情有住即非住無行方是行踈越捨吳典
朱絃鄙秦箏淡薄貴無味羊斟慙大羹洪遠包乾坤幽
宵潛沉冥罔煩跬步舉頓達萬里程廬遠尚莫曉隱留
曾誤聽直須持妙說共詣毘耶城

薰字子溥為宣歙觀察使前不治薰以才力自將牙將
素驕共謀逐出之奔楊之後分司東都懿宗時為左丞
薰端勁再知禮部引寒俊士類多遺老號所居為隱嵩
自號七松處士云

大中八年掌文誤以顏標為魯公之後以第一人處之
士子嘲曰主司頭腦太冬烘錯認顏標作魯公鄭谷有
故少師從翁隱巖別業亂後榛蕪感舊愴懷之作即薰
也詩云風騷為主人凡俗仰清塵密行稱閨閫明誠動

搢紳周旋居顯重內外掌絲綸妙主蓬壺籍忠為社稷

臣大儀墻仞峻東轡紀綱新聞善嘗開口推公豈為身

立朝鳴珮貴歸宅典衣貧半醉看花晚中殮煮菜春晴

臺隨鹿上幽野約僧隣理論知清越

清越江左詩僧公甚稱之

生徒

得李頻藥香沾筆硯竹色染衣巾寄鶴眠雲叟騎驢入

室賓

咸通中舉子乘馬唯張喬跨驢延於門下

近將姚監比

自姚監祕合主張風雅後孤卿

一人而已

僻與段御親

故少常成式與學辛勤章句及徵孤卿為前序

葉積池邊路

茶遲雪後新所難留著述誰不棄陶鈞喪亂時多變退

思事已陳浮華重發作雅正甚湮淪宗從今何在依棲

素有因七松無影響

孤卿植松七株自號七松處士

雙淚益悲辛猶喜

于門秀年來屈併伸

班即孤卿姪孫登進士科級也

王軒

軒少為詩頗聞淇澳之篇遊西江泊舟葑蘿山下題西

施石曰嶺上千峰秀江邊細草春今逢浣紗石不見浣

紗人

軒登太和進士第

宋雍

范攄云宋雍初無令譽及嬰瞽疾其詩名始彰盧負外
綸作擬僧之詩僧清江作七夕之詠劉隨州有眼作無
眼之句宋雍無眼作有眼之詩詩流以為四背或云四
倒然辭意悉為佳致盧公詩云願得遠公知姓字焚香
洗鉢過餘生清江詩曰唯愁更漏促離別在明朝劉隨
州曰細雨濕衣看不見閑花落地聽無聲雍詩曰黃鳥
不堪愁裏聽綠楊宜向雨中看

李摯

貞元十二年摯以宏詞振名與李行敏同姓同甲子同年登第俱二十五歲又同門摯嘗有詩曰因緣三紀異契分四般同

韋澳

字子斐以宏詞登科懿宗時為邠寧節度使坐事罷鎮以祕書監分司東都嘗戲吟云莫將韋監同殷鑒錯認容身是保身此句聞於京師權倖尤怒之

段文昌

古栢文云是草木有異於草木則靈武侯祠前栢壽千
齡盤根擁門勢如龍形含碧太空散霧虛庭合抱在於
旁枝駢梢葉之青青百尋及於半身蓄風雷之冥冥攢
柯垂陰分翠閒明忽如虬螭向空爭行上承翔雲孤鸞
時鳴下蔭芳苔凡草不生古色天風蒼蒼玲玲曾到靈
山老栢縱橫亦有大者莫之與京於惟武侯佐蜀有程
神其不昏表此為禎斯廟斯栢實播芳馨長慶二年六

月題

文昌字墨卿有別業在廣都縣之南龍華山嘗杜門力
學于此俗謂之段公讀書臺長慶初朝議文昌少在西
蜀諳詳利病詔授劔南節度使有邑人贈詩曰昔日騎
驢學忍飢今朝忽著錦衣歸等閑畫虎驅紅旆可畏登
龍入紫微富貴不由翁祖致文章生得羽毛飛廣都再
去應惆悵猶有江邊舊釣磯

文昌還別業有尋龍華山寺廣宣上人詩云十里惟聞

松桂風江山忽轉見龍宮正與休師方話舊風煙幾度
入樓中郭震亦有題龍華山詩曰昔年曾到此山回百
鳥聲中酒一盃最好寺邊開眼處段文昌有讀書臺

出古

今詩
話

文昌父鐸為江陵糾文昌長自諸宮客遊成都韋南康
與秦釋褐為賓從後劉闢逐作外邑高崇文收蜀召復
舊職指其椅曰此猶不足與君坐文昌遽請歸闕至興
元西鵠鳴驛有僧倚巴山之隈有前識謂文昌曰去日

既逢梅藥綻來時應見杏花開至京屢外擢自相位拜
劔南節度西至鵲鳴僧已物故杏花方盛

文昌客荊州從事劔南帥幕其後相穆宗罷相鎮蜀再
相文宗罷相帥荊南復鎮蜀太和九年卒

文昌鎮蜀有題武擔寺西臺詩云秋天如鏡空樓閣盡
玲瓏水暗餘霞外山明落照中鳥行看漸遠松韻聽難
窮今日登臨意多歡語笑同

文昌晚夏登張儀樓呈院中諸公詩云重樓窓戶開四

望斂煙埃遠岫林端出清波城下迴乍疑蟬韻促稍覺
雪風來併起鄉關思銷憂在酒杯

姚向

和登武擔寺西臺詩云開閣錦城中餘閑訪梵宮九層
連畫景萬象寫秋空天半將身到江長與海通提携出
塵土曾是穆清風

向奉陪段相公晚夏登張儀樓詩云秦相架羣材登臨
契上台查從銀漢落江自雪山來儼曲親流火凌風洽

小杯帝鄉如在目欲下盡徘徊
向為節度判官時長慶二年也

溫會

登武擔寺西臺詩云桑臺煙樹中臺榭造雲空眺聽逢
秋興篇辭變國風坐愁高鳥起笑指遠人同始媿才情
薄躋攀繼韻窮

晚夏登張儀樓詩云危軒重疊開訪古上徘徊有舌嗟
秦策飛標駕楚材雲霄隨鳳到物象為詩來欲和關山

意已歌調更哀

會以殿中侍御史為安撫判官

楊汝士時掌管記和西臺詩云清淨此道宮層臺復倚
空偶時三伏外列席九霄中平視雲端路高臨樹杪風
自憐榮末座前日別池籠

又和張儀樓詩云從公城上來秋近絕纖埃樓古秦規
在江分蜀望開遠山標宿雪末席本寒灰陪賞今為忝
臨歡敢訴杯

李敬伯

登武擔寺西臺詩云臺上起涼風垂開覽歲功自隨台
席貴盡許羽觴同樓殿斜暉照江山極望通賦詩思共
樂俱得詠時豐

晚夏登張儀樓詩云層屋架城隈賓筵此日開文鋒摧
八陣星分應三台望雪煩襟釋當歡遠思來披雲霄漢
近暫覺出塵埃

敬伯試大理評事為觀察巡官

姚康

晚夏登張儀樓詩云登覽值晴開詩從野思來蜀川新
草木春日舊樓臺池景搖中座山光接上台近秋宜晚
景極目斷浮埃

登武擔寺西臺詩云松逕引清風登臺古寺中江平沙
岸白日下錦川紅疎樹山根淨深雲鳥跡窮自慚陪末
席便與九霄通

康試右武衛倉曹參軍為觀察推官

康禮部試早春殘雪云微暖春潛至輕明雪尚殘銀鋪
光漸濕珪破色仍寒無柳花常在非秋露正團素光浮
轉薄皓質駐應難幸得依陰處偏宜帶月看玉塵銷欲
盡窮巷起袁安

魚縱云水府垂閑望圓波息躍魚從來暴泥久今日脫
泉初得志寧相忌無心任宛如龍門應可度鮫室豈常
居掉尾方窮樂遊鱗每自舒垂流千里去風力藉吹噓
康字汝諧南仲孫也登元和十五年進士第大中時為

太子詹事開成時曾以賦敗

張正元

冬日可愛詩云寒日臨清晝遠天一望時未消埋徑雪
先暖讀書帷屬思光難駐舒情影若移晉臣曾比德謝
客昔言詩散彩寧偏照流陰信不追餘輝如可就迴燭
幸無私

東野聞夜啼贈張正元云寄泣須寄黃河泉此中怨聲
流徹天愁人獨有夜燈見一紙鄉書淚滴穿

正元登貞元五年進士第

楊嗣復

丁巳歲八月祠祭畢因題臨淮公舊碑詩云齋莊修祀
事旌旆出郊闔薙草軒墀狹塗墻赭堊新謀猷期作聖
風俗奉為神酹酒成坳澤持兵列偶人非才膺寵任異
代揖芳塵况是平津客碑前淚滿巾

楊汝士和云古栢森然地修嚴蜀相祠一過榮異代三
顧盛當時功德流何遠馨香薦未衰敬名探國志飾象

慰毗思昔謁從征蓋今聞擁信旗固宜光寵下有淚刻
前碑

臨淮公武元衡也元和初元衡鎮蜀嗣復為節度推官
後二十七年嗣復鎮蜀時太和九年也汝士為東川節
度使故相唱和汝士曾為蜀帥段文昌掌管也

炙轂子

牡丹詩云牡丹妖艷亂人心一國如狂不惜金昌若東
園桃與李果成無語自成陰

松詩云寒松聳拔倚蒼岑綠葉扶疎自結陰丁固夢時
還有意秦皇封日豈無心常將正節栖孤鶴不遣高枝
宿衆禽好是特凋羣木後護霜凌雪翠踰深

竹詩云庭竹森疎玉質寒色已蔥碧盡琅玕翠筠不染
湘娥淚斑籜堪裁漢主冠成韻含風已蕭瑟媚漣凝淥
更檀欒此君引鳳為龍日聳節梢雲直上看
炙轂子王獻也元和後詩人

楊厚

早起云星漢轉寒更伊余索寞情鐘催歸夢斷鴈引遠
愁生危壁蘭光暗疎簾露氣清閑庭聊一望海日未分

明

厚貞元間詩人

劉郇伯

早行云鎮靜人猶寢天高月自涼一星深戍火殘月半
橋霜客老愁塵下蟬寒怨路傍青山依舊色宛是馬卿
鄉

郇伯與范鄴郎中為詩友范曾得一句云歲盡天涯雨
久而莫屬郇伯曰何不曰人生分外愁范甚賞之

出北夢瑣言

王觀

早行云鷄唱催人起又生前去愁路明殘月在山露宿
雲收村店煙火動漁家燈燭幽趨名與趨利行役幾時
休

觀大厯貞元間人

陳上美

咸陽懷古云山連河水碧氛氲瑞氣東移擁聖君秦苑
有花空笑日漢陵無主自侵雲古槐堤上鶯千轉遠渚
沙中鶯一群賴與淵明同把菊煙郊四望夕陽曛
上美登開成進士第

侯洌

冽金谷園懷古云金谷千年後春花發滿園紅芳徒笑
日穠艷尚迎軒雨濕輕光軟風搖碎影翻猶疑施錦帳

堪歎罷朱紉愁態鶯吟澁啼容露綴繁慙問前事桃
李竟無言

冽登元和六年進士第

崔樞

賜耆老布帛云殊私及耆老聖德賑黎元布帛忻天賜
生涯作主恩情均皆挾纊禮異賁邱園慶洽時方泰仁
沾月告存寧知酬雨露空識荷乾坤擊壤將何幸徘徊
望九門

裴均舉宏詞崔樞考之落第及均為宰相擢樞為禮部
笑謂樞曰聊以報德也終於祕書監

順宗時有詔曰古之所以教太子必茂選師傅以輔翼
之法於訓詞而行其典禮左右前後罔非正人是以教
諭而德成也給事中陸質中書舍人崔樞積學懿文守
經據古夙夜講習庶協于中並充皇太子侍讀

陳彥博

恩賜魏文正公諸孫舊第以導直臣云阿衡隨逝水池

館主他人天意能酬德雲孫喜庇身生前由直道歿後振芳塵雨露新恩日芝蘭故里春勲庸流十代光彩映諸隣共喜昇平代從茲得諫臣

前定錄云彥博元和中與謝楚同為廣文生夢一官司列几案上有尺牘如金字者問之曰明年進士之名見其名在三十二從上二人皆李姓而無楚名明年果如夢二李即李顧行李仍叔也時元和五年明年楚於于尹躬下擢第

白居易為翰林學士奏云今日奉宣令撰李師道請收贖魏徵宅還其子孫甚合朕心允依來奏者臣伏以魏徵太宗宰相盡忠輔佐以致太平在其子孫合加優卹事關激勸合出朝廷師道何人輒掠此美伏願明勅有司特以官錢收贖使還後嗣以勸忠臣則事出皇恩美歸聖德憲宗深然之其後有司以為詩題試進士

郭良驥

自蘇州至望亭驛有作云南浦菰蒲遠白蘋東吳黎庶

逐黃巾野棠自發空流水江燕初歸不見人遠岫依依
如送客平田渺渺獨傷春淮中廻首長洲苑烽火年年
報虜塵

觀詩所載疑李錡叛時事也

崔嘏

嘏字乾錫邢州刺史會劉稹反歸朝授考功郎中中書
舍人李德裕之謫嘏草制不盡書其過貶端州刺史
施肩吾與之同年不睦嘏舊失一目以珠代之施嘲之

曰二十九人及第五十七眼看花元和十五年也

李景遜

景遜字後已贈太尉澄孫也大中中進御史大夫威肅
當朝為大夫三月蔣伸輔政宣宗盡書羣臣名內器中
禱憲宗神前射取之而景遜名不得乃見宰相自陳考
深當代即拜西川節度使景遜好獎寒士如李蔚楊知
退所善蘇滌裴夷直

寄華州周侍郎立秋日奉詔祭嶽詩云關河豁靜曉雲

開承詔秋祠太守來山霽蓮花添翠黛路陰桐葉少塵埃
朱輜入廟威儀肅玉步昇壇步武回往歲今朝幾時
事謝君非重我非才

自大中至咸通相白敏中次畢誠曹確使相羅劬權崔
相愐由戲曰可以歸矣近日中書皆蕃臣謂畢白曹羅
皆蕃姓也始自蔣伸景遜在蜀聞報曰不能伏事斯人
也遽託疾離鎮有詩曰成都十萬戶拋若一鴻毛

出杜
夢瑣

言

唐球

球有詩名如臨池洗硯云恰似有龍深處卧被人驚起
黑雲生又有漸寒沙上鷺欲暖水邊村亦佳句也球居
蜀之味江山方外之士也為詩撚藁為圓納之大瓢中
後臨病投瓢於江曰斯文苟不沉沒得者方知吾苦心
爾至新渠有識者曰唐山人瓢也接得之十纔二三其
題有處士隱居云不信最清曠及來愁已空數點水泉
雨一溪霜葉風葉在有山處道成無事中酌盡一樽酒

老夫顏亦紅贈行如上人云不知名利苦念佛老岷峨
衲補雲千片香焚篆一窠戀山人事少憐客道心多日
日齋鐘罷高懸瀟水羅題青城范賢觀云數里緣山不
厭難為尋真訣問黃冠苔鋪翠點山橋滑松織香梢古
道寒晝傍綠畦薝蔔嫩玉夜開紅竈撚新丹孤鐘已斷泉
聲在風動瑤花月滿壇贈僧云曾聞半偈雪山中貝葉
翻時理盡通般若常添持戒力落叉誰算念經功雲間
曉月應難染海上虛舟自信風長說滿庭花色好一枝

紅是一枝空

已上詩見
芳亭客話

球生於唐末至性純慤篤好雅道放曠疎遠邦人謂之
唐隱居或云王建帥蜀召為參謀不就今以其故居為
隱居寺

壯夢瑣言曰球詩遊歷不出二百里

李洞贈唐山人云長鬚長似髮七十色如鰲醉眼青天
小吟情太華低千年松遶屋半夜雨連溪邛蜀路無限
往來琴自携

不知是
球否也

唐詩紀事卷五十

欽定四庫全書

唐詩紀事卷五十一

宋 計敏夫 撰

白敏中

魏扶

馬植

崔鉉

殷堯藩

沈亞之

裴夷直

楊敬之

房千里

厲元

喻鳧

楊衡

符載

王彥威

繁知一

楊洵美

白敏中

敏中字用晦武宗欲召用居易德裕即薦敏中文類其

兄而有器識即日知制誥宣宗立德裕貶乃力詆之五年十三遷至門下侍郎咸通二年以太傅致仕卒

至日上公獻壽酒云候曉天門闢朝天萬國同瑞雲昇觀闕香氣映華宮日色臨仙籙龍顏對昊穹羽儀瞻百姓獻壽侍三公化被君王洽恩沾草木豐自欣朝玉座宴此詠皇風

敏中方為郎唯李德裕時以國器重之大中初邊鄙不寧吐蕃崛強宣宗決於致討延英先問宰臣敏中首奏

興師遂為統帥宣宗初覽捷書云我知敏中必殄兇醜
敏中凱旋與同列宰輔進詩

敏中詩云一詔皇城四海頌醜戎無數束身還戍樓吹
笛人休戰牧野嘶風馬自閑河水九盤收數曲天山千
里鎖諸關西邊北塞今無事為報東南夷與蠻

魏扶詩云蕭關新復舊山川古戍秦原景象鮮戎虜乞
降歸惠化皇威漸被懾腥膻穹廬遠戍煙塵滅神武光
揚竹帛傳左衽盡知詞帝澤從茲不更備三邊

崔鉉詩云邊陲萬里注恩波宇宙羣方洽凱歌右地名
王爭解辦遠方戎壘盡投戈煙塵永息三秋戍瑞歲遙
清九折河共偶聖明千載運更觀俗阜與時和

王起長慶中再主文柄意欲以第一人處敏中恨其與
賀拔甚為友甚有文而落魄因密令親知述意俾與甚
絕敏中欣然曰如所教既而甚造門左右給以敏中他
適甚遲留不言而去俄頃敏中躍出見甚於是悉以實
告乃曰一第何門不致奈輕負至交相與歡醉或語於

起起曰我此只得敏中今當更取甚矣遂以第一人處
甚而敏中居三焉

杜牧云今皇帝一詔會兵不日功集河湟關郡次第歸
降因獻詩云捷書皆應運謀期十萬曾無一鏃遺漢武
慙誇朔方地宣王休道太原師威加塞外寒來早恩入
河源凍合遲聽取滿城歌舞曲涼州聲韻喜參差牧又
和敏中詩呈上三相云行看臘破好年光萬壽南山對
未央黠憂可汗修職貢文思天子復河湟應須日御西

巡狩不假星弧壯射狼吉甫裁詩歌盛業一篇江漢美
宣王牧又作河湟詩云元載相公曾借筋憲宗皇帝亦
留神旋見衣冠就東市忽遺弓劍不西巡牧羊驅馬雖
戎服白髮丹心盡漢臣唯有涼州歌舞曲流傳天下樂
閑人

魏扶

扶登太和四年進士第大中初知禮闈入貢院題詩云
梧桐葉落滿庭陰鎖閉朱門試院深曾是當年辛苦地

不將今日負前心
勝出無名子
削為五言詩
以譏之
李義叟義山弟也是歲登第
義山因上魏公詩曰
國以斯文重
公仍內署才風標
森太華星象逼中台
朝滿遷
鷺侶門多吐鳳來
寧同魯司寇只鑄一顏回

馬植

敏中之捷植時為相和敏中詩云舜德堯仁
化犬戎許
提河隴
款皇風
指揮疆武
皆神算
恢拓乾坤
是聖功
四
帥有征無汗馬
七關雖戍已橐弓
天留此事還英主
不

在他年在大中

同華解最利元和中令狐楚鎮三峯時及秋賦榜云特
加試五場莫有至者唯盧洪正請試已試兩場而植求
解植將家子從事竊笑曰此未可知已而試登山採玉
賦略曰文豹且異於驪龍採斯跡矣白石又殊於武蚌
剖莫得之公大伏其精遂奪解元後洪正自丞郎將判
鹺俄為植所據復以手札戲植曰昔日華元已遭毒手
今來鹺務又中老拳植罷安南都護又除黔南殊不得

意維舟峽中古寺寺前有長堤夜月明甚見白衣緩步
堤上吟曰截竹為筒作笛吹鳳凰池上鳳凰飛勞君更
向黔南去即是陶鎔萬類時邀問則失之矣後自黔南
召入為大理遷刑判鹽鐵拜相

植字存之為李德裕所抑頗怨望宣宗立白敏中當國
凡德裕所不善悉不次用之故植遂相

崔鉉

魏公鉉元略之子也為兒時隨父訪韓晉公浞浞指桀

上鷹令詠焉吟曰天邊心膽架頭身欲擬飛騰未有因
萬里碧霄終一去不知誰是解條人滉曰此兒可謂前
程萬里也寶曆三年登第久居廊廟三擁節旄宣宗嘗
謂侍臣曰崔鉉真貴客裴休真措大初李石鎮江陵辟
為戎倅一旦告去既入京華俄昇翰苑造朝凡三歲石
未離荆渚崔既秉鈞衡石馳牋賀之曰某早拜先塵叨
承眷與深蒙異分屢接清言幸曾顧於厚恩俯見循於
末契去載分麾南楚拜節西秦思賢方咏於嘉魚棲止

寶慙於威鳳賓筵初啟曾陪罇俎之歡將幕未移已在
陶鎔之下光生隣部喜溢轅門豈唯九土獲安斯亦一
方多幸乃掌記李隲之詞也

鉉字台碩相武宗與李德裕不叶罷復相宣宗除揚州
大都督府長史封魏國公宣宗於太液亭賦詩宴餞有
七載秉鈞調四序之句識者榮之

殷堯藩

元和九年韋貫之掌文衡堯藩雜文黜矣尚書楊漢公

乃貫之前榜門生盛言堯藩屈貫之為之重收是年登

第

撫言謂之
既落復收

上已贈都上人云三月初三日千家與萬家蝶飛秦地
草鶯入漢宮花鞍馬皆爭麗笙歌盡鬪奢吾師無所願
唯願老煙霞

又云曲水公卿宴香塵盡滿街無心修禊事獨步到禪
齋細草繁愁目繁花逆旅懷綺羅人走馬遺落鳳凰釵
堯藩登第許渾贈詩云幾載聞名翰墨林為從知己信

浮沉青山有雪諳松性碧落無雲稱鶴心帶月獨歸蕭
寺遠翫花頻醉庾樓深尋思一見如瓊樹空把新詩舊
日吟

堯藩從李翱長沙幙府後以侍御官江南姚合有送堯
藩歸同州詩

堯藩為永樂令雍陶寄詩云古縣蕭條秋景晚昔時陶
令亦如君

堯藩有憶江南詩三十章皆蘇杭事樂天詩曰江南名

郡數蘇杭寫在殷家三十章君是旅人猶苦憶我為刺
史更難忘

堯藩有宮詞云吳宮愛歌舞夜夜醉嬋娟見日吹紅燭
和塵掃翠鈿徒令句踐霸不信子胥賢若問長洲草荒
涼無限年又有館娃宮詩云宮女三千去不回真珠翠
羽是塵埃夫差舊國久破碎紅鷺自歸花自開又有暮
煙葵葉屋秋月竹枝歌句欲射狼星把弓箭休將螢火
讀詩書句右張為取作主客圖

堯藩未第時許渾寄詩云直道知誰用經年向水濱宅
從栽竹貴家為買書貧就學多新客登朝盡故人蓬萊
自有路莫羨武陵春又訓堯藩云相如愧許詢寥落向
溪濱竹馬兒猶小荆釵婦慣貧獨愁憂過日多病不如
人莫恠青袍選長安隱舊春

沈亞之

字下賢登進士第太和初李同捷反詔兩河諸鎮出兵
反無功乃授栢耆德利行營諸軍計會使亞之以殿中

侍御史為判官諭旨會李祐平德州同捷窮請降者乃
馳入滄誅同捷諸將嫉其功比奏攢詆文宗不獲已貶
耆循州司戶參軍亞之南康尉張祐以詩送云秋風江
上草先是客心摧萬里故人去一行新鴈來山高雲緒
斷浦迥日波頽莫恠南康遠相思不可裁亞之吳人元
和七年不第李賀以詩送云吳興才人怨春風桃花滿
陌千里紅紫絲竹斷駿馬小家住錢塘東復東是也
杜牧之贈詩云斯人清唱何人和草遯苔荒不可尋一

夕小敷山下夢水如環珮月如襟

亞之村居詩云無樹巢宿鳥無酒共客醉月上蟬韻殘
梧桐陰繞地獨出村舍門吟劇微風起蕭蕭蘆荻叢叫
嘯同山鬼應緣我憔悴為我發愁思

五月發石頭城步望前船示弟詩云客子去淮陽蹉跎
客夢長水關開夜鑠霧棹起晨涼烟月期同賞風波忽
異行隱帆曾撼櫓轉瀨指遙檣蒲葉錢刀綠筠筒楚粽
香因書報惠遠為我憶檀郎

李商隱擬沈下賢詩云千二百輕鸞春衫瘦著寬倚風
行稍急含雪語應寒帶火遺金斗兼珠碎玉盤河陽看
花過曾不問潘安

裴夷直

王質傳云李德裕擢為河南尹宣歙觀察使幕府若河
東裴夷直天水趙哲隴西李行方梁國劉蕡皆一時選
云

獻劉蕡書情云白髮添雙鬢空宮又一年音書鴻不到

夢寐杳空懸地遠星辰側天高雨露偏聖朝知有感雲
海漫相連

同樂天中秋夜洛河翫月二首詩云清洛半秋懸璧月
綵船當夕泛銀河蒼龍領底珠皆沒白帝心邊鏡乍磨
海上幾時霜雪積人間此夜管絃多須知天地為鑪意
盡取黃金鑄作波

又云不熱不寒三五夕晴川朗月正相臨千珠盡沒蒼
龍領一鏡高懸白帝心幾處淒涼綠地遠有時惆悵值

雲陰如何清洛如清晝共見初升又見沉

李景遜傳云所善蘇滌裴夷直皆為宗閔嗣復所擢故
景遜在會昌時抑厭不遷

夷直字禮卿文宗時為右拾遺張克勤以五品官推與
其甥夷直時為禮部外郎劾曰是開後日賣爵之端詔
聽遂著于令為中書舍人武宗立視冊牒不肯書出刺
杭州斥驩州司戶參軍宣宗初復拜江華等州刺史終
散騎常侍夷直戲唐仁烈詩云自知年幾偏應少先把

屠蘇不讓春儻更數年逢此日遂應惆悵羨他人

楊敬之

客思吟云禾黍正離離南園翦白芝細腰沉趙女高髻
唱蠻姬路愧前崗月梳慚一領絲鄉人不可語獨念畏
人知

姚合寄楊祭酒云日日新詩出城中寫不禁清光宜對
竹閑雅勝聞琴門戶饒秋景兒童解令吟雲山持管盡
莫惜別人尋

敬之字茂孝文宗命為祭酒兼太常少卿是日二子戎
載登科時號揚家三喜敬之華山賦最為韓愈李德裕
所稱士林一時傳布霜樹烏棲夜空街雀報明碧山相
倚暮歸雁一行斜右張為取作主客圖

房千里

房千里博士初上第遊嶺徼詩序云有進士韋滂者自
南海邀趙氏而來為余妾西上京都調于天官余乃與
趙別約中秋為會期趙極悵戀余乃抒詩寄情曰鸞鳳

分飛海樹秋，忍聽鐘鼓越王樓。只應霜月明君意，緩撫

瑤琴送我愁。山遠莫教雙淚盡，鴈未空寄八行幽。相如

若返臨邛市，畫舸朱軒萬里遊。

萬里橋在蜀州

房至襄州逢渾侍御赴弘農藩揚之命乃以情意相託
許到府邸遣人訪之則趙氏却從韋矣渾寄房詩曰春
風白馬紫絲韁，正值蠶眠未採桑。五夜有心隨暮雨，百
年無節待秋霜。重尋綉帶朱藤合，却認羅裙碧草長。為
報西遊減離恨，阮郎纔去嫁劉郎。

千里以罪居廬陵作所居竹室記云子方窮不能奮其處于是亦宜矣

千里字鵠舉太和進士也終於高州刺史

馬使君與千里俱貶端州李羣玉留別詩云俱來海上嘆煙波君佩銀魚我觸羅經國才微甘放蕩專城年少豈蹉跎應憐旅夢千重思共愴離心一曲歌唯有管絃知客意分明吹出感恩多

厲元

元日觀朝云玉座臨新歲朝盈萬國人火連雙闕曉仗
列五門春瑞雪銷駕瓦祥光在日輪天顏不敢視稱慶
拜空頻

元太和二年進士終於侍御史有子自南登中和進士
第

元有從軍行云邊草早不春
劍花增野塵戰場收驥尾
清瀚怯龍鱗帆色起歸越
松聲厭避秦幾時逢范蠡處
處是通津
右張為取作主客圖

姚合題厲侍御所居云幽棲一畝宮清峭似山峯隣里
不通徑俸錢惟買松野人時寄宿谷鳥自相逢朝路床
前是誰知曉起慵

喻鳧

元日即事云斂板賀交親稱觴詎有巡年光悲擲舊景
色喜呈新水柳煙中重山梅雪後真不知將白髮何以
度青春

贈李商隱云羽翼恣搏扶山河使筆驅月疎吟夜桂龍

失詠春珠草細盤金勒花繁倒玉壺徒嗟好章句無力
致前途

浴馬云解控復收鞭長津動細漣空蹄沉綠玉濶臆沒
連錢沫漩橋聲下嘶盤柳影遶常聞稟龍性固與白波
便

姚合有送喻鳬歸毗陵詩云闕下詩名出鄉中賦籍除
又曰吾亦家吳者無因見樊廬杜荀鶴叙雪寄鳬詩曰
比時行選無人迹唯望音徽問寂寥

鳧毗陵人開成進士也卒於烏程令

顏凋明鏡覺思苦白雲知句滄洲迷釣隱紫閣負僧期

句酬難塵鬢皓坐久壁燈青句滄洲未歸迹華髮受恩

心句右張為取作主客圖

北夢瑣言云鳧體閬仙為詩嘗謁杜紫微不遇乃曰我
詩無羅綺鈿粉宜其不售也

鳧與方干友善干嘗贈詩云知心似古人歲久分彌親
離別波濤闊留連槐柳新暮陵寒貫酒漁浦夜垂綸自

此星居後音書豈厭頻又哭鳧詩云日夜役神多損壽
先生下世未終年撰碑縱託登龍伴營奠應支賣馬錢
狐壟陰風吹細草空窓濕氣漬殘篇人間別更無冤事
到此誰能與問天

楊衡

初隱廬山有盜其文登第者衡因詰闕亦登第見其人
盛怒曰一一鶴聲飛上天在否荅曰此句知兄最惜不
敢偷衡笑曰猶可恕也

宿青牛谷云隨雲步入青牛谷青牛道士留我宿可憐
夜久月明中唯有壇邊一枝竹

題花樹云都無看花意偶到樹邊來可憐枝上色一一
為愁開

竹亭送姪偁云落葉寒擁壁清霜夜霑石正是憶山時
復送歸山客殷勤一樽酒曉月當窓白

寄廬山隱者云風鳴雲外鐘鶴宿千年松相思杳不見
月出山重重

哭李象云白鷄黃犬不將去寂寞空餘葬時路草死花
開更幾年後人知是何人墓憶君思君獨不眠夜寒月
照青楓樹

邊思云蘇武節旄盡李陵音信稀花當隴上發人向壠
頭歸

仙女辭云玉笋初侍紫皇君金縷鴛鴦滿絳裙仙宮一
閉無消息遙結芳心向碧雲

孟東野有悼吳興楊衡詩云君生雲水清君死雲水渾

空有骨肉親哭得日月昏
大夜不復曉古松長閉門
琴絃綠水絕詩句青山存
昔為芳春顏今為芳草根
獨恨冥漠理先儒未嘗言
衡與符載崔群隱廬山號
山中四友

衡寄徹公云北風吹霜霜月明
荷葉枯盡越水清別來幾度
龍宮宿雪山童子應相逐

題山寺云千峰白露後雪壁挂殘燈
曙色海邊月經聲松下僧意閑門不閉
年去水空澄稽首如何問森羅盡

一垂

送孔周之南海謁王尚書云泛棹送流萍桂寒山更青
望雲生碧落看日下滄溟潮盡收珠母沙閑拾翠翎自
趨龍戟下再為頌芳馨

符載

載字厚之蜀人有奇才始與楊衡宋濟習業青城山衡
擢第濟老死無成唯載以王霸自許恥於常調韋臯鎮
蜀辟為支使雖曰受知尚多偃蹇臯嘗於二十四化設

醺請撰齋詞于時陪飲於摩訶池載離席盥漱命小吏
十二人捧硯人各兩題緩步池間各授口占其敏速如
此劉闢時為金吾曹參軍始依臯焉載與撰真贊云
矯矯化初氣傑文雄靈螭出水秋鶚垂風行義則固輔
仁乃通他年良覲麟閣之中及臯卒闢摠留務載亦在
幕中及闢敗載遂免禍載居廬山遣三尺童子持數幅
書乞買山錢百萬於于頔于即與之

柳子厚賀趙江陵宗儒啓云伏聞以武都符載為記室

天下立志之士雜然相顧繼以歎息知為善者得其歸
嚮流言者有所聞執直道之所行義氣之所揚堂堂焉
實在荆山之南矣夫以符君之藝術志氣為時聞人才
位未會盤旋固久中間因緣陷在危邦與時偃仰不廢
其道而為見忌嫉者橫致唇吻房給事以高節特立明
之於朝王吏部以清議自任辨之於外然猶小人浮議
困在交戟凡諸侯之欲得符君者城聯壤接而惑於騰
沸環視相讓莫敢先舉及受署之日則皆開口垂臂悵

望悼悔譬之採珠於海而徑寸先得則衆皆怏然罷去
知竒寶之有所歸也嗚呼巧言難明下流多謗自非大
君子出世之氣則何望焉瞻望清風若不在天外無任

感激欣躍之至

房式傳云劉闢發兵書牒首曰
闢副曰式參謀曰符載似謗也

崔羣送載歸蜀覲省序云旄頭光明垂三十載不習俎
豆化為侯王者十有八九焉由是隱逸憔悴羔雁不行
蒼山沉沉側陋不顯建中初有峨嵋客符君發六籍棹
三湘深入匡廬絕跡半紀學窺顏子之門闔文紹陳君

之骨鯁逸慕嚴光之垂釣志效管寧之不欺結廬熙熙
人不知其然也頃予奉命江西三年往復彭蠡未嘗不
詠湖月漱天倪造符君雲扃宿五老峰下動更晦朔不
理還擢偶丹霄至人白鶴羽客奉靈芝跪天壇相顧永
息乎蓬瀛豈復又縈於塵網賴君超澹愴興舊遊雖笑
語飲食如常終忽忽若居大夢君家在岷蜀展愛高堂
將聖賢典籍充人子幣帛期所以激衰俗扇清風方伯
地君不以厚禮遲吾子予未之信秋九月楚人歌採蘭

以送之

或云載始隱廬山不為章句學員元中李巽為江西觀察薦其材授奉禮部郎為南昌軍副使繼辟西川韋臯掌記澤潞郃士美參謀歷協律郎監察御史卒嘗以牋叩襄陽樊澤曰故處士孟浩然邛隴顏沒公欲更築大墓久之未遑誠令好事者垂而有人負公夙志矣澤乃更為刻碑鳳林山南村寵其墓

王彥威

長安舊俗以不歷臺省出領廉車節鎮者率呼為麈官
大槩重內而輕外今東京皇城乾元門舊章武軍鼓角
樓也節度使王彥威有詩刻石在其上曰天兵十萬勇
如貔正是酬恩報國時汴水波瀾喧鼓角隋堤楊柳拂
旌旗前驅紅旆關西將坐間青蛾趙國姬寄語長安舊
冠蓋麈官到底是男兒彥威自太常博士出辟使府至
茲鎮故有是句後梁氏建國其石不知所在薛能亦有
謝寄茶詩云麈官寄與真拋却賴有詩情合得嘗洪文

館舊不置學士文宗特置一員以待彥威為戶部侍郎
邊兵訴所賜不時鱣皆赦惡貶衛尉卿俄為忠武節度
徙宣武卒

繁知一

樂天除蘇州刺史自峽泂流赴郡時秭歸縣繁知一聞
居易將過巫山先於神女祠粉壁大書之曰忠州刺史
今才子行到巫山必有詩為報高唐神女道速排雲雨
候清詞居易覩之悵然邀知一至曰歷陽劉郎中禹錫

三年理白帝欲作一詩而不能罷郡經過悉去千餘詩
但留四章而已

沈佺期詩曰巫山高不極合沓奇狀新閭谷疑風雨幽
崖若鬼神月明三峽曙潮滿九江春為問陽臺客應知
入夢人

王無競詩曰神女向高唐巫山下夕陽徘徊作行雨婉
孌逐荆王電影江前路雷聲峽外長朝雲無處所臺館
曉蒼蒼

皇甫冉詩曰巫峽見巴東迢迢出半空雲藏神女館雨
到楚王宮朝暮泉聲落寒暄樹色同清猿不可聽偏在
九秋中

李端詩曰巫山十二重皆在碧空中迴合雲藏日霏微
雨帶風猿聲寒度水樹色暮連空悲向高唐去千秋見
楚宮居易吟四篇與繁生同濟卒不賦詩

楊洵美

荅李昌期詩云三山載群仙峨峨鹹浪中雲衣翦不得

此路安可從我生亦何事出門如飛蓬白日又黃昏所
悲瑤草空蟲聲故鄉夢枕上禾黍風吾道如未喪天運
何時通

洵美登寶曆元年進士第終監察御史

洵美有暮鷗不噪禁城樹衙鼓未殘兵衛秋之句洎答
昌期詩張為取作主客圖



唐詩紀事卷五十一

欽定四庫全書

集部

唐詩紀事卷五十二至

四

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

膳錄監生臣劉能

膳錄監生臣楊其梓

欽定四庫全書

唐詩紀事卷五十二

宋 計敏夫 撰

雍裕之

裴潯

皇甫曙

李肱

皇甫松

徐凝

張祜

崔涯

盧儲

趙璜

柴夔

王繼勳

夏鴻

曹汾

楊鴻

易重

雍裕之

敢競桃李色自呈刀尺功蝶猶迷剪翠人豈辨裁紅

剪
綵

花

野酌亂無巡送君兼送春明年春色至莫作未歸人

春晦

送客

裕之貞元後詩人也

五雜組云五雜組刺繡窠往復還織錦梭不得已戍交河

自君之出矣寶鏡為誰明思君如隴水長聞嗚咽聲

裴潏

長安豪貴惜春殘爭賞先開紫牡丹別有玉杯承露冷
無人起就月中看

長安三月十五日兩街看牡丹甚盛慈恩寺元果院花
最先開太平院開最後潯作白牡丹詩題壁間太和中
駕幸此寺吟翫之久因令宮嬪諷念及暮歸則此詩滿
六宮矣

潯河東人柳泌為憲宗治丹劑潯上疏極諫帝卒以藥
棄天下世以為知言潯以兵部侍郎卒嘗哀古今辭章

續文選號太和通典上之當時之士非與遊者不取世恨其隘

開成元年李衛公分司東都居平泉別墅潁述其素尚賦四言詩十四章兼述山泉之美明年衛公觀察浙西潁自兵侍尹河南乃刻于石首章云動靜有源進退有期用在得正明以知微夫惟哲人會且有歸靜固致動安每慮危將憇于盤止亦先機

皇甫曙

立春日呈宮傳侍郎云朝旦微風吹曉霞散為和氣滿
家家不知容貌潛消落且喜春光動物華出閤池水猶
塞岸歸尋園柳未生芽摩挲酒甕重封閉待入新年共
賞花

曙元和十一年中書舍人李逢吉下登第逢吉所擢多
寒素時有詩曰元和天子丙申年三十三人同得仙袍
似爛銀文似錦相將白日上青天是歲高澣第一人劉
端吳行李方周匡物廖有方輩皆預選寶厯間崔從鎮

淮南曙為行軍司馬

李肱

開元太平日萬國賀豐歲梨園厭舊曲玉座流新製鳳
管遞參差霞衣競搖曳宴罷水殿空輦餘香草細蓬壺
事已久仙樂功無替誰肯聽遺音聖明知善繼

肱開成二年試霓裳羽衣曲詩也是年秋帝命高錡復
司貢籍詔曰夫宗子維城本枝百代封爵所宜無令廢
絕常年宗正寺解送人恐有浮薄以忝科名在卿精揀

藝能勿妨賢路所試賦則准常規詩則依齊梁體格乃
試琴瑟合奏賦霓裳羽衣曲詩主司先進五人詩其最
佳者李肱次則王牧乃以榜元及第帝覽之曰近屬如
肱者其不忝乎

高鋈奏曰臣錯昨日奉宣進旨令將進士所試詩賦進
來者伏以陛下聰明文思天縱聖德今年詩賦題目出
自宸衷體格雅麗意思遐遠諸生捧讀相賀自古未有
倍用研精覃思磨礪緝諧其今年試詩賦比於去年又

勝數等臣日夜考校敢不推公就中進士李肱霓裳羽衣曲詩一首最爲迥出更無其比詞韻既好去就又全臣前後吟咏近三五十遍雖使何遜復生亦不能過兼是宗枝臣與狀頭第一人以獎其能次張堂詩一首亦絕好亞次李肱臣與第二人其次沈黃中琴瑟合奏賦又似文選中雪月賦體格臣與第三人其次王牧賦自立意緒言語不凡臣與第四人其次柳棠詩賦興思敏速日中便成臣與第五人凡此五卷詩賦擢其中科實所

不愧其餘三十五人或獎舊文別錄人材非止一途四面搜擇臣並與及第李肱舊文亦好人物絕竒每事且他日必為卿相宗枝之俊實謂難得況屬籍之中讀書為文者甚少伏望聖恩俯留宸覽李肱等三人詩賦若有不堪敢受欺天之罪如或可採伺候聖心其李肱詩賦伏望陛下聖慈特賜降獎飾宣示百寮以勸皇族修飾之道臣謬忝主司不勝悽悽之誠其詩賦摠為一卷謹隨狀奉進以聞

范攄云肱止於岳齊二牧

皇甫松

古松感興云皇天后地力使我向此生貴賤不我均若
為天地情我家世道德旨意匡文明家集四百卷獨立
天地經寄言青松姿豈羨朱槿榮昭昭大化光共此遺
芳馨

怨回紇歌云白首南朝女愁聽異域歌收兵頡利國飲
馬胡蘆河毳布腥膻久穹廬歲月多雕巢城上宿吹笛

淚滂沱

又云祖席駐征棹開帆候信潮隔筵桃葉泣吹管杏花
飄船去鷗飛閣人歸塵上橋別離惆悵淚江路濕紅蕉
松著醉鄉日月三卷自叙也或曰松丞相奇章公表甥
公不薦舉怨望因襄陽大水極言誹謗有夜入真珠室
朝遊玳瑁宮之句真珠公愛姬名也

拋球樂詩云紅撥一聲飄輕毬墜越綃帶翻金孔雀香
滿綉蜂腰少少拋分數花枝正索饒

又云金盞花球小真珠綉帶垂幾回衝蠟燭千度入春懷上客終須醉觥盃自亂排

松有登郭隗臺詩云燕相謀在茲積金黃巍巍上者欲何顏使我千載悲又有勸僧酒詩云勸僧一盃酒共看青青山酣然萬象滅不動心印閑右張為取作主客圖松韓門弟子湜之子也

徐凝

宿洌上人房云浮生不定若蓬飄林下真僧偶見超覺

後始知身是夢更聞寒雨滴芭蕉

凝睦州人樂天詩中有李郎中訪徐凝山人云郡守輕
詩客鄉人薄釣翁解憐徐處士惟有李郎中

張祜

題金山寺云一宿金山頂微茫水國今僧歸夜船月龍
出晚堂雲樹影中流見鐘聲兩岫聞因悲在朝市終日
醉醺醺

寓懷寄蘇州劉郎中云一聞周召佐明時西望都門強策

羸天子好文才自薄諸侯力薦命猶奇賀知章口徒勞
說益浩然身更不疑唯是勝遊行未遍欲離京國尚遲
遲

入潼關云都城三百里雄險此廻環地勢遙尊嶽河流
側讓關秦皇曾虎視漢祖昔龍顏何處梟兇輩干戈自
不閑

故國三千里深宮二十年一聲河滿子雙淚落君前自
倚能歌曲先皇掌上憐新聲何處唱腸斷李延年二章

祜所作宮詞也傳入宮禁武宗疾篤目孟才人曰吾即
不諱爾何為哉指筌囊泣曰請以此就縊上憫然復曰
妾嘗藝歌請對上歌一曲以泄其憤上許乃歌一聲河
滿子氣亟立殞上令醫候之曰脉尚溫而腸已斷帝崩
柩重不可舉或曰非俟才人乎爰命其櫬櫬至乃舉祜
為孟才人嘆序曰才人以誠死上以誠命雖古之義激
無以過也歌曰偶因歌態詠嬌頻傳唱宮中十二春却
為一聲河滿子下泉須弔孟才人

杜牧之守秋浦與祜遊酷吟其宮詞亦知樂天有非之
之論乃為詩曰睫在眼前人不見道超身外更何求誰
人得似張公子一首詩輕萬戶侯

寧哥來云日映宮城霧半開太真簾下畏人猜黃翻綽
指向西樹不信寧哥迴馬來

退宮人云開元皇帝掌中憐流落人間二十年長說承
天門上宴百官樓下拾金錢又云歌喉漸退出宮闈泣
訴伶官上許歸猶說入時歡聖壽內人初著五方衣

玉環琵琶云宮樓一曲琵琶聲滿眼雲山是去程迴顧
段師非汝意玉環休把恨分明

春鶯轉云興慶池南柳未開太真先把一枝梅內人已
唱春鶯轉花下傚傚軟舞來

容兒鉢頭云爭走金車叱鞅牛笑聲惟是說千秋兩邊
角子羊門裏猶學容兒弄鉢頭

邠娘羯鼓云新教邠娘羯鼓成大酺初日最先呈冬兒
指向真真說一曲乾鳴杖子輕

要娘歌云宜春花夜雪千枝妃子偷行上密隨便唱要
娘歌一曲六宮生老是娥眉

悖拏兒舞云春風南內百花時道調涼州急遍吹搗手
便拈金碗舞上皇驚笑悖拏兒

集虛臺云日光斜照集虛臺紅樹花迎曉霧開昨夜小
皇新授籙太真含笑入簾來

阿鵬湯云月照宮城紅樹芳絳窓燈永在雕梁金輿未
到長生殿妃子偷尋阿鵬湯

和杜牧之齊山登高云秋溪南岫菊霏霏急管繁絃對
落暉紅葉樹深山逕斷碧雲江淨浦帆稀不堪孫盛嘲
時笑願送王洪醉夜歸流落正憐芳意在砧聲徒促授
寒衣

感王將軍柘枝妓歿云寂寞春風舊柘枝舞人休唱曲
休吹鴛鴦鈿帶拋何處孔雀羅衫付阿誰畫鼓不聞招
節拍錦靴空想挫腰支今來坐上偏惆悵曾是堂前教
徹詩

題于越亭云扁舟亭下駐煙波十五年遊重此過洲嘴
露沙人渡淺樹梢藏竹鳥啼多山銜落照歌紅蓋水壓
斜紋卷綠羅腸斷中秋正圓月夜來誰唱異鄉歌

世傳韋鮑二生以妾換馬之事云韋生下第東歸同憩
水閣鮑有美妾韋有良馬鮑以夢蘭小情佐歡飲酣停
盃閱馬軒檻韋曰能以人換任選殊尤鮑欲馬之意頗
切密遣四絃更衣盛裝頃之而至乃命勸韋酒歌云白
露濕庭砌皓月臨前軒此時去留恨含思獨無言又歌

送鮑生酒云風颭荷珠雖暫圓多生信有短因緣西橋
今夜三更月還照離人泣斷絃韋乃命牽紫叱撥以酬
之俄有紫衣冠二人自閣西升階而來二生恐悚闔戶
窺之一人長髯云足下賦云斜漢左界北陸南躔白露
曖空素月流天可謂光絕對曰何不見賞風霽地表雲
斂天末洞庭始波木葉微脫今佳月如畫可以為賦長
髯曰向聞妾換馬之事可以為題以彼傾城求其駿足
為韻長髯曰彼佳人兮如瓊之英此良馬兮負駿之名

將有求於駿足亦何惜於傾城香暖深閨未厭天桃之色風清廣陌曾憐噴玉之聲希逸曰原夫人以矜其容馬乃稱其德既各從其所好諒何求而不克長跪而別姿容休耀其金鈿右牽而來光彩頓生於玉勒文通曰步及庭砌効當軒墀望新恩懼非吾偶也戀舊主疑借人乘之香散綠驄意已忘於鬢髮汗流紅頰愛無異於凝脂希逸曰是知事有廢興用有取舍彼以絕代之容為鮮矣此以軼羣之足為貴也買笑之恩既盡有類求

之據鞍之力尚存猶希進也賦訖行十餘步而失故袪
有愛妾換馬之什云綺閣香銷華廐空忍將行雨換追
風休憐柳葉雙眉綠却愛桃花兩耳紅侍宴永辭春色
裏趣朝休立漏聲中恩勞未盡情先盡暗泣西風兩意同
袪長慶中深為令狐楚所知楚鎮天平自草薦表令以
詩三百篇隨狀表進袪至京屬元稹在內庭上問之稹
曰袪雕蟲小巧壯夫不為或獎激之恐變陛下風教上
領之由是失意東歸有孟浩然身更不疑之句

驪宮小禽名阿濫堆明皇御玉笛採其聲翻為曲且名
馬遠近以笛爭效之祜有華清宮詩曰紅樹蕭蕭閣半
開玉皇猶幸此宮來至今風俗驪山下村笛猶吹阿濫
堆

皮日休云祜字長吉元和中作宮體小詩辭曲艷發當
時輕薄之流能其才合譟得譽老大稍窺建安風格誦
樂府錄知作者本意短章大篇往往間出講諷怨譎時
與六義相左右善題目佳境言不可刊置別處此為才

子之最也或薦之天子書奏不下亦受辟諸侯府性狷
介不容物輒自劾去以曲阿地古澹有南朝遺風遂築
室種植而家焉性嗜木石悉力致之從南海間罷職事
載羅浮石笋還不蓄美田利產為身後計死未二十年
而故姬遺孕凍餒不暇豈其怨刺於神明耶天果不愛
才沒而猶譴耶又進士顏萱過祜丹陽遺居見其愛姬
崔氏貧居荆榛下有一子杞兒求食汝墳矣憫然作詩
弔之

萱詩曰憶昔為兒逐我兄曾拋竹馬拜先生書齋已換
當時主詩壁空題故友名豈是爭權留怨敵可憐當路
盡公卿柴扉草屋無人問猶向荒田責地征

日休詩云勝華通子共悲辛荒逕今為舊宅隣一代交
遊非不貴五湖風月合教貧魂應絕地為才鬼名與遺
編在史臣聞道平生偏愛石至今猶泣洞庭人

陸龜蒙云先生清骨葬煙霞業破孤存孰為嗟樂篋詩
編分貴位一林石笋散豪家兒過舊宅啼楓影姬遶荒

田泣稗花唯我共君堪便戒莫將交譽作生涯

杞兒後名望虔

嘉興監裴洪慶以爲冬瓜堰官

張爲作主客圖以白樂天爲廣大教化主而以祜爲入

室取其句云萬國見清道一身成白頭

上令孤相公句

此地榮

辱盛豈宜山中人

秋晚句

葛溪謾淬張家劍却是猿聲斷

客腸

葛溪句

書空疑未決卓地計初成

拄杖句

春申還有三

千客寂寞無人報李園

句

杜牧之酬祜詩云七子論詩誰似公曹劉須在指揮中

薦衡昔日知文舉

令狐公曾表薦

乞火無人作蒯通北極樓臺

長挂夢西江波浪遠吞空可憐故國三千里虛唱歌辭

滿六宮

或言祐清河人嘗賦淮南詩有人生只合揚州死禪智
山光好墓田大中中果卒於丹陽隱舍

崔涯

崔涯吳楚人與張祐齊名其妻雍氏乃摠校之女夫婦
相歡而涯不禮其妻父妻父不平之奪其女為尼涯不

得已為詩留別曰隴上泉流隴下分斷腸嗚咽不堪聞

嫦娥一八月中去巫峽千秋空白雲

或謂崔
膚之作

詠春風云動地經天物不傷高情逸韻住何方扶持燕
雀連天去斷送楊花盡日狂遶桂月明過萬戶弄帆晴
晚渡三湘孤雲雖是無心物借便吹教到帝鄉

太行嶺上三尺雪崔涯袖中三尺鐵一朝若遇有心人
出門便與妻兒別涯俠士詩也涯與張祐失意游俠江
淮此詩往往傳於人口

盧儲

李翱江淮典郡儲以進士投卷翱禮待之置文卷几案間因出視事長女及笄閑步鈴閣前見文卷尋繹數回謂小青衣曰此人必為狀頭迨公退李聞之深異其語乃令賓佐至郵舍具語於儲選以為壻儲謙辭久之終不却其意越月遂許來年果狀頭及第纔過關試徑赴嘉禮催粧詩曰昔年將去玉京遊第一仙人許狀頭今日幸為秦晉會早教鸞鳳下粧樓後盧止官舍迎內子

有庭花開乃題曰芍藥斬新栽當庭數朶開東風與拘束留待細君來人生前交固非偶然耳

趙璜

正月云正月今朝半陽臺信未迴水芹寒不食山杏雨應開世網留三宿真源寄一杯因聲謝猿鳥歲宴會歸來

題七夕圖云帝子吹簫上翠微秋風一曲鳳凰歸明年七月重相見依舊高懸織女機

七夕詩曰烏鵲橋頭雙扇開
年年一度過河來
莫嫌天上稀相見
猶勝人間去不迴
欲減煙花饒俗世
暫煩煙月掩樓臺

璜開成三年登第

柴夔

望九華山詩云九華如劍插雲霓
青霽連空望欲迷
壯截吳門疑地盡
南連楚界覺天低
龍池水醮中秋月
石路人攀上漢梯
惆悵舊遊無復到
會須登此出塵泥

夔登太和中進士第

王繼勲

贈和龍妙空禪師詩云白面山南靈慶院茅齋道者雪
峰禪只棲雲樹兩三畝不下煙蘿四五年猿鳥認聲呼
喚易龍神降伏住持堅誰知今日秋江畔獨步醫王闡
法筵

夏鴻

和贈和龍妙空禪師詩云翰林遺跡鏡潭前孤峭高僧

此處禪出為信門興化日坐當吾國太平年身同瑩澈
尼珠淨語並鋒銚慧劍堅道果已圓名已遂即看千匝
遶香筵

鴻登開成進士第

曹汾

早發靈芝望九華寄杜使君詩云戴月早歸三秀館平
明初辨九華峰嵯峨玉劍寒芒利裊裊青蓮翠葉重恠
狀却疑人畫出嵐光似為客添濃行香若到五溪上此

處褰幃正面逢

汾以尚書鎮許下其子希幹及第用錢二十萬牒至鎮
張宴置牒於側時進士胡錡有啓賀略曰桂枝折處著
萊子之綵衣楊葉穿時用魯連之舊箭

汾先登第故也

又曰一

千里外觀上國之風光十萬軍前展長安之春色

汾字道謙開成四年登第希幹咸通十四年登第汾終
戶部侍郎汾懿宗宰相確之弟確罷相為鎮海節度使
以扞龐勛功就加太子太師汾為忠武節度入為戶部

判度支弟兄並列將相之任時人榮之

楊鴻

晴望九華山詩云九華閑屋簇清虛氣象群峯盡不如
惆悵都南掛冠吏無人解向此山居

鴻登開成二年進士第

易重

會昌五年陳商下進士張漬第一重次之後詔白敏中
重考覆落漬等八人而重居榜首有詩寄宜陽兄弟云

六年雁序恨分離
詔下今朝遇已知
上國皇風初喜日
御堦恩渥屬身時
內庭再考稱文異
聖主宣名獎藝奇
故里仙才若相問
一春攀得兩重枝

唐詩紀事卷五十二

欽定四庫全書

唐詩紀事卷五十三

宋 計敏夫 撰

喬琳

王鉞

于興宗

李朋

楊牢

李汶儒

薛蒙

李鄴

于瓌

王巖

劉騷

李渥

盧栢

劉璐

李續

盧求

田章

高璩

牛徵

蕭祐

魏譽

陸肱

李商隱

劉得仁

喬琳

絳州越王樓卽事云三蜀澄清郡政閑登樓携酌日躋
攀頓覺胸懷無俗事迴看掌握是人寰灘聲曲折涪州
水雲影低銜富樂山行鴈南飛似鄉信忽然西笑向秦
關

琳為郭子儀朔方掌書記與連舍畢曜相掉訐貶巴州
司戶參軍歷果綿遂懷四州刺史建中初為朱泚叛為
偽吏部尚書後伏誅臨刑歎曰我以七月七日生以此

日死非命耶

王鉞

登越王樓見喬公詩偶題云雲架重樓出郡城虹梁雅
韻仲宣情越王空置千年跡丞相兼揚萬古名過鳥時
時衝客會閑風往往弄江聲謬將蹇步尋芳躅魚目驪
珠豈繼明

鉞大厯中代喬琳為綿州刺史

于興宗

夏杪登越王樓臨涪江望雪山寄朝中知友詩云巴西
西北樓堪望亦堪愁山亂江迴遠川清樹欲秋晴明中
雪嶺煙靄下魚舟寫寄朝天客知予恨獨遊

大中時以御史中丞守絳州後為洋川節度初在左絳
作此詩和者李朋楊牢輩皆朝中知友也

許渾訓絳州于中丞見寄云故人書信越褒斜新意雖
多舊約賒皆就一麾先去國共謀三徑未還家荆巫夜
隔巴江月鄖郢春連漢上花半月離居猶恨望可堪垂

白各天涯

李朋

綿州中丞以江山小圖遠垂賜及兼寄詩云巴江與雪山井邑共廻環圖寫丹青內分明煙靄間移君名郡興助我小齋閑日想登臨處高蹤不可攀

朋為尚書郎和于興宗詩

朋除刑部員外郎制云將仕郎御史李朋能積行實發

其辭華方正端慎官業克舉

杜牧之句

楊宰

牢洪農人少孤年六歲母俾入雜學誤入人家乃父友也方彈棋戲以局為題俾牢賦之應聲曰魁形下方天頂亞二十四寸牕中月年十八中第

奉酬于中丞見寄之什詩云劒外書來日驚忙自拆封丹青得山水強健慰心胸事少勝諸郡江迴見幾重寧悲久作別且似一相逢詩合焚香詠愁應賴酒濃庾樓寒更憶腸斷雪千峰

牢登大中二年進士第最有詩名大中時顧陶作唐詩
類選去取甚嚴其初云刪定之初如楊牢等十數公時
猶在世及稍稍淪謝一篇一詠未稱所錄若續有所得
當列為卷軸庶無遺恨

李汶儒

和絳州于中丞詩云珍重巴西守殷勤寄遠情
劍峰當戶碧詩韻滿樓清日照涪川閣煙籠雪嶠明
微黃看即及莫歎滯江城

汶儒登太和五年進士第官至翰林學士汶儒守禮部
員外郎充翰林學士制云才行冠時名聲巽然揚厯臺
閣宣昭職業無入而不得其道守正而莫混其源並為
儒者之英獨蘊賢人之操久遊安在相見何晚

杜牧
之詞

薛蒙

和綿州于中丞詩云左綿江上樓五馬此銷愁暑退千
山雪風來萬水流迢迢猶刺郡繫滯似維舟即有徵黃
日名川莫厭遊

蒙時為考功郎

李鄴

和絳州于中丞詩云長聽巴西事看圖勝所聞江樓明
返照雪嶺亂晴雲景象詩情在幽竒筆跡分使君徒說
好不抵怨離羣

鄴時為戶部郎官

于瓌

和絳州于中丞詩云樓因藩邸號川勢似依樓顯敞含

清暑風光入素秋山宜姑射貌江泛李膺舟郢曲思朋
執輕紗畫勝遊

又云極目郡城樓浮雲拂檻愁政成多暇日詩思覺先
秋遠霽千巘雪隨波一葉舟昔曾窺粉繪今願許陪遊
瓌字正德教之子也大中七年進士第一人時為校書
郎

王巖

和于中丞詩云雉堞臨朱檻登茲便散愁蟬聲怨炎夏

山色報新秋江轉穿雲樹心閑隨葉舟仲宣徒有歎謝
守幾追遊

嚴大中時布衣

劉駢

題越王樓寄獻中丞使君詩云朱軒迴壓碧煙州昔歲
賢王是勝遊山簇劍峰朝闕遠水如巴字遶城流人間
物象分千里天上笙歌醉五侯今日登臨無限意同霑
惠化自銷愁

駢時為鄉貢進士

李渥

秋日登臨越王樓詩曰越王曾拔劍南州因向城隅建
此樓橫玉遠開千嶠雪暗雷下聽一江流畫簷先弄朝
陽色朱檻低臨衆木秋徒學仲宣聊四望且將詞賦好
依劉

渥時為鄉貢進士後登第

劉璐

洋州于中丞頃牧左綿題詩越王樓上朝賢繼和輒課
四韻詩云隔政代君侯多慙跡令猷山光來戶牖江鳥
滿汀洲雅韻徵朝客清詞寫郡樓至今謠未已注意在
洋州

璐為綿州刺史隔政代興宗璐曾刺蜀州

盧楠

和于中丞見寄詩云圖畫越王樓開緘慰別愁山光涵
雪冷水色帶江秋雲島孤征鴈煙帆一葉舟嚮風舒霽

景如伴謝公遊

栢時為洪文館學士

李續

和中丞見寄詩云早年登此樓退想不勝愁地遠二千

里時將四十秋

續相從東川奏舉過綿州刺史韋洪遭
臯尚書携登此樓於今三十七年矣

述多失路華皓任虛舟詩酒雖堪使何因得共遊

續時為同州刺史

盧求

和于中丞見寄詩云高情推謝守善政屬綿州未落紫
泥詔閑登白雪樓晴江如送日寒嶺鎮迎秋滿壁朝天
士唯予不繫舟

求登寶曆二年進士第李翱之婿也翱典合肥有道人
號先知始翱妹婿楊嗣復知舉求落第至是嗣復再知
舉道人以小卷遺嗣復曰放榜日開之洎放榜開卷乃
曰裴頭黃尾三求六李時第一人裴求榜末黃駕次則
李球盧求又李方玄從毅道裕景初李助李球共六人

道人又謂翱曰公之子不如外孫後求子携鄭亞子畋
李審權子遜能為相皆翱外孫也

田章

和于中丞云志乖多感物臨眺更增愁暑候雖云夏江
聲已似秋雪遙難辨木村近好維舟莫恨歸朝晚朝簪
擬勝遊

章登開成四年進士第

高璩

白敏中自劍南節度移荆南經忠州追尋樂天遺迹有
詩云南浦花臨水東樓月映風璩時為書記有詩云公
齋一到人非舊詩板重尋墨尚新璩自梓州刺史入朝
經綿州與刺史薛逢登越王樓逢以詩贈別云乘遞初
登劒外州傾心喜事富平侯方當游藝依仁日便到攀
轅卧轍秋客聽已歌消子夜許陪仙躅上危樓欲知恨
戀情深處聽取長江旦暮流璩和云劍外縣州第一州
樽前偏喜接君留歌聲婉轉添長恨管色淒涼似到秋

但務歡娛思曉角獨耽雲水上高樓莫言此去難相見
怨別徵黃是順流

璩字瑩之第進士第翰林學士擢諫議大夫學士超省
郎進官者惟鄭顥以尚主而璩以寵升懿宗時為宰相
卒曾鄴言璩宰相交游醜雜進取多蹊徑謚法不思妄
愛曰刺請謚為刺

牛徵

登越王樓即事詩云危樓送遠目信美奈鄉情轉岼孤

舟疾銜山落，照明蕭條看。
草色惆悵認，江聲誰會登。
臨恨從軍白髮生。

徵登咸通二年進士第叢之子也

蕭祐

遊石堂觀詩云：西山高高何所如？上有古昔真人居。
嶽崖巨石自成室，其下磅礴含清虛。
我來斯邑訪遺迹，乃遇沈生耽載籍。
沈生為政哀惻戢，又能索隱探靈竒。
欣然向我話佳境，與我崎嶇到山頂。
甘瓜割綠出寒泉，碧

甌浮花酌春茗嚼瓜啜茗身清涼汗消締綌如迎霜胡
為空山百草花脩爾蓮豆肆我旁始驚知周無大小力
寡多方驗斯在妙用騰聲冠蓋間勝遊恣意煙霞外故
碑石像凡幾年雲鬱雨霏生綵煙我知遊此多靈仙縹
緲月中飛下天天風微微夕露委松梢颼颼曉聲起鳳
去空遺簫管音星翻零落銀河水勸君學道此時來結
茅獨宿何遠哉齋心玄默感靈衛必見鸞鶴相徘徊我
愛崇山雙劍吐峰如人首拄天黑

俗呼為人頭山

羣仙偃倭勢

奔走狀若歸尊超有德半巖有洞頂有池出入靈怪潛
蛟螭我去不得晝夜思夢遊曾信南風吹南風吹我到
林嶺故國不見秦天迥山花名草撲地香月色泉聲洞
心冷蔭松散髮逢異人寂寞曠然口不言道陵公遠莫
能識髮短耳長誰獨存司農驚覺忽惆悵可惜所遊俱
是妄蘊懷耿耿誰與言直至今來意通形神開擁傳又
恨斜陽催一邨人境尚堪戀何況海上金銀臺
祐於唐為祠部郎中

魏謩

宣宗重陽錫宴群臣有御製詩其略曰款塞旋征騎和
戎委廟賢傾心方倚注叶力共安邊宰臣以下應制皆
和上曰宰相魏謩詩最佳其兩聯云四方無事去宸豫
杪秋來八水寒光起千山霽色開上嘉賞久之魏蹈舞
拜謝群僚聳視魏有得色極歡而罷

謩字申之文宗時以直言拜右補闕大中時鎮蜀宣宗
曰謩名臣孫有祖風朕心憚之然卒以剛正為令狐綯

所忌讒罷之

陸肱

松詩云霜雪知勁質今古占嘉名
斷砌盤根遠踈林偃蓋清鶴栖何代色
僧老四時聲鬱鬱心彌久煙高萬井生

肱大中九年登進士第咸通六年自前振武從事試平判入等後牧南康郡辟許棠為郡從事鄭谷寄詩云江山多勝境賓主是貧交肱以春賦得名

李商隱

商隱字義山懷州人英國公世勳裔孫令狐楚帥河陽
奇其文使與諸子游楚歷鎮表為巡官卒於工部侍郎
商隱累佐王茂元鄭亞柳仲
郢故樊南甲乙之集作焉 溫庭筠段成式俱以儷偶
相夸號三十六體

楊大年出義山詩示陳恕酷愛一絕云珠箔輕明覆玉
墀披香新殿鬪腰支不須看盡魚龍戲終遣君王怒偃
師嘆曰古人措辭寓意如此深妙令人感慨不已大年

又曰鄧帥錢若水舉賈誼兩句云可憐半夜虛前席不
問蒼生問鬼神錢云措意如此後人何以企及鹿門先
生唐彥謙為詩慕慕玉溪得其清峭感愴盡其一體也
然警絕之句亦多有

商隱賦云豈如河畔牛星隔年只聞一過不及苑中人
柳終朝剩得三眠注漢中有人形柳一日三起三側義
山少遊投宿逆旅主人會客召與坐不知其為義山也
酒酣席客賦木蘭花詩義山後就曰洞庭波冷曉侵雲

日日征帆送遠人幾度木蘭舟上望不知原是此花身
坐客覽之大驚詢之乃義山也

商隱為彭陽公從事彭陽之子絢繼有韋平之拜惡商
隱從鄭亞之辟以為忘家恩疎之重陽日商隱留詩於
其廳事曰曾共山翁把酒卮霜天白菊遶堦墀十年泉
下無消息九日罇前有所思不學漢臣栽苜蓿空教楚
客詠江離郎君官貴施行馬東閣無因再得窺絢乃補
太學博士尋為東川柳仲郢判官府罷客滎陽卒

錦瑟詩云錦瑟無端五十絃一絃一柱思華年莊生曉
夢迷蝴蝶望帝春心託杜鵑滄海月明珠有淚藍田日
暖玉生煙此情可待成追憶只自當時已惘然
或云錦瑟令狐楚之妾

劉得仁

聽松聲詩曰庭際微風暖高松韻自生聽時無物亂盡
日覺神清強以幽泉並翻嫌細雨并拂空增鶴唳過牖
合琴聲況復當秋杪偏宜在月明不知幽澗底飄飄有

誰聽

樂遊原春望云樂遊原上望望盡帝城春始覺繁華地
應無不醉人雲開雙闕麗柳映九衢新愛此偏高野閑
來竟日頻

題邵公禪院云無事門多掩陰階竹掃苔勁風吹雪聚
渴鳥啄冰開樹向寒山得人從瀑布來終期天目老擎
錫逐雲回

悲老宮人云白髮宮娃不解悲滿頭猶自插花枝曾緣

玉貌君王愛准擬人看似舊時

得仁貴主之子自開成至大中三朝昆弟皆歷貴仕而
得仁苦於詩出入舉場三十年卒無成常自述曰外家
雖是帝當路且無親又云外族帝王是中朝親故稀翻
令浮議者不許九霄飛既終詩人競為詩弔之僧栖白
詩曰忍苦為詩身到此冰魂雪魄已難招若教桂子落
墳上生得一枝冤始銷

吟苦曉燈暗露深秋草疎舊山多夢到流水送愁餘

風定一池星句右張為取作主客圖

宿宣義里池亭云暮色遶柯亭南山幽竹青夜深斜舫
月風定一池星島嶼無人傍菰蒲有鶴翎此中休便得
何必泛滄溟

聽歌云朱檻滿明月美人歌落梅忽驚塵起處疑有鳳
飛來一曲聽初徹幾年愁暫開東南正雲雨不得見陽
臺

長信宮云簾涼秋氣初長信恨何如拂黛月生指鮮鬟

雲滿梳一役悲畫扇幾度泣前魚坐聽南宮樂清風搖
翠裙

唐詩紀事卷五十三